

Jean Nsabimana 'Dubai' n'abo bareganwa bakatiwe gufungwa Iminsi 30 y'agateganyo

May 16, 2023

Urukiko rw'Ibanze rwa Gasabo mu Mujyi wa Kigali, rwateye utwatsi icyifuzo cy'abantu 4 cyo gufungurwa bagakurikiranwa bari hanze. Aba bakurikiranweho icyaha cyo gukoresha ububasha bahabwa n'itegeko mu nyungu zabo bwite.

Abo ni abahoze ari abayobozi m Karere ka Gasabo, barimo Stephen Rwamurangwa wahoze ari Umuyobozi w'Akarere, Reymond Chretien Mberabahizi wahoze ari Umuyobozi w'Akarere ka Gasabo ushinzwe ubukungu, Jeanne d'Arc Nyirabihogo wahoze ayobora ishami ry'ubutaka ndetse na Jean Baptiste Bizimana wahoze ashinzwe imyubakire. Hakaba n'umunyemari Jean Nsabimana uzwi nka Dubai.

Bose bakurikiranweho ibyaha bifitanye isano n'[umudugudu uzwi nk'Urukumbuzi Real Estate uri mu Murenge wa Kinyinya mu Karere ka Gasabo, wubatswe mu buryo busondetse.](#)

Uko ari batanu nta n'umwe wari mu rukiko ubwo abacamanza basomaga imyanzuro ku ngingo y'ifungwa n'ifungurwa by'agateganyo.

Gusa uwitwa Jean Baptiste Bizimana wahoze ashinzwe imyubakire yarekuwe kuko urukiko rwasanze nta cyaha kimuhama.

Urukiko rwavuze ko ibyavuye mu iperereza ry'ibanze bifite uburemere bwatuma abasigaye badafungurwa mu rwego rwo gukomeza gukusanya ibimenyetso ku byaha bakekwaho.

Tariki ya 8 uku kwezi ni bwo aba baregwa bari bagejejwe imbere y'urukiko bwa mbere maze banga kuburana ku mpamvu z'uko batari biteguye.

Kuri uyu wa Kabiri urukiko rwategetse ko igihe cy'ifungwa cyongerwa indi minsi 30 mu Igororero rya Nyarugenge i Mageragere.